

**PM Umum Tujuh Projek Untuk Kelantan
Mstar Online
21 Januari, 2013
Oleh MAZWAN NIK ANIS dan SYED AZHAR**

KOTA BHARU: Barisan Nasional (BN) berjanji akan melaksanakan tujuh projek yang memerlukan ia memenangi Kelantan dalam pilihan raya umum akan datang sebagai sebahagian daripada manifesto negeri itu.

Perdana Menteri, Datuk Seri Najib Tun Razak berkata, projek-projek itu akan meningkatkan lagi keadaan dan potensi rakyat.

Projek tersebut termasuk pembinaan lebuh raya Kuala Krai-Kota Bharu, sebuah stadium baru dan menyelesaikan masalah air.

Najib, yang juga pengerusi BN, berkata BN juga akan membina 3,000 unit rumah, menubuhkan kampus UiTM di sini, memulakan perkhidmatan bas Rapid Kota Bharu dan membina masjid terbesar di negeri ini berharga kira-kira RM50 juta.

"Ini adalah hanya sebahagian manifesto kami. Ia belum lagi lengkap. Akan ada perkara-perkara lain yang akan diumumkan kemudian. Ini adalah janji Barisan Nasional," beliau berkata pada program Janji Ditepati semasa lawatan beliau sehari ke negeri itu pada Ahad.

Menurut Najib, transformasi tidak boleh dilakukan hanya dengan slogan atau mencorakkan cat hijau di dinding, bumbung dan pagar sahaja sebaliknya secara menyeluruh kepada rakyat seperti program pembangunan dan kemajuan yang dilaksanakan BN.

Selain itu, katanya, BN telah menunjukkan kemampuan membawa transformasi kepada negeri itu.

"Apa yang perlu anda lakukan adalah beri kami mandat dan anda akan melihat transformasi berlaku di Kelantan," katanya.

Dalam temu bual secara langsung dengan KelantanFM, Najib berkata, rakyat di negeri ini mempunyai keazaman yang kuat untuk berjaya dan sebagai kerajaan bertanggungjawab, BN akan menyediakan lebih banyak peluang.

"Apabila kerajaan Persekutuan dan negeri datang dari parti yang sama, semua polisi pembangunan boleh dilaksanakan dengan mudah untuk membawa manfaat kepada rakyat," katanya.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2013/1/21/mstar_berita/20130120123432&sec=mstar_berita